

VIJEĆE MINISTARA BOSNE I HERCEGOVINE

560

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08) i člana 42. stav (1) Pravilnika o sistemima kvalitete za prehrambene proizvode ("Službeni glasnik BiH", broj 90/18), Vijeće ministara Bosne i Hercegovine, na prijedlog Agencije za sigurnost hrane Bosne i Hercegovine, na 173. sjednici održanoj 10. juna 2019. godine, donijelo je

ODLUKU O OVLAŠTENIM TIJELIMA ZA OCJENJIVANJE USAGLAŠENOSTI ZA PROIZVODE ZAŠTIĆENE OZNAKE PORIJEKLA, ZAŠTIĆENE OZNAKE GEOGRAFSKOG PORIJEKLA I GARANTIRANO TRADICIONALNOG SPECIJALITETA

Član 1.
(Predmet)

Ovom odlukom ovlašćuje se jedno ili više kontrolnih tijela koja djeluju kao tijela za ocjenjivanje usaglašenosti za proizvode zaštićene oznake porijekla, zaštićene oznake geografskog porijekla i garantirano tradicionalnog specijaliteta (u daljem tekstu: tijela za ocjenjivanje usaglašenosti).

Član 2.

(Tijela za ocjenjivanje usaglašenosti)

- (1) Na osnovu ispunjavanja uslova iz člana 42. Pravilnika o sistemima kvalitete za prehrambene proizvode ("Službeni glasnik BiH", broj 90/18) (u daljem tekstu: Pravilnik), kao tijelo za ocjenjivanje usaglašenosti, ovlašćuje se Organska kontrola d.o.o. Sarajevo.
- (2) Javni poziv za prijavu tijela za ocjenjivanje usaglašenosti stalno je otvoren na web stranici Agencije za sigurnost

hrane Bosne i Hercegovine (u daljem tekstu: Agencija), www.fsa.gov.ba. Po prijavi na Javni poziv jednog ili više tijela za ocjenjivanje usaglašenosti, a na osnovu ispunjavanja uslova iz člana 42. Pravilnika, Agencija priprema dopunu ove odluke i istu dostavlja Vijeću ministara Bosne i Hercegovine na razmatranje i donošenje.

- (3) Lista ovlašćenih tijela za ocjenjivanje usaglašenosti objavljuje se u "Službenom glasniku BiH".

Član 3
(Zadaci)

- (1) Tijelo za ocjenjivanje usaglašenosti provodi postupak provjere usaglašenosti sa specifikacijom proizvoda kao i postupak potvrđivanja usaglašenosti sa specifikacijom proizvoda, za zaštićene oznake porijekla, zaštićene oznake geografskog porijekla i garantirano tradicionalnog specijaliteta, a detaljni zadaci i način rada propisani su Pravilnikom.
- (2) Ako tijelo za ocjenjivanje usaglašenosti utvrdi da proizvođač proizvoda, s nazivom zaštićenim kao zaštićena oznaka porijekla, zaštićena oznaka geografskog porijekla i garantirano tradicionalnog specijaliteta, odnosno korisnik oznake, kao i svaki učesnik u lancu proizvodnje, prerade i distribucije, ne proizvodi proizvod u skladu sa specifikacijom proizvoda, odnosno utvrdi velike neusaglašenosti, o tome mora bez odgadanja obavijestiti Agenciju i nadležnu inspekciju.
- (3) Nadzor nad radom tijela za ocjenjivanje usaglašenosti provodi Agencija.

Član 4.
(Troškovi)

Troškove utvrđivanja usaglašenosti snose podnosioci zahtjeva ili korisnici oznaka porijekla, oznaka geografskog porijekla i garantirano tradicionalnog specijaliteta.

Član 5.

(Prestanak važenja)

Danom stupanja na snagu ove odluke, prestaje da važi Odluka o davanju ovlaštenja pravnim licima za oblast oznake originalnosti i oznake geografskog porijekla prehrambenih proizvoda ("Službeni glasnik BiH", broj 86/16).

Član 6.

(Pravni akti EU s kojima se vrši usklađivanje)

Ovom odlukom preuzimaju se odredbe člana 36. i člana 37. Uredbe Komisije (EU) broj 1151/2012 od 21.11.2012. o sistemima kvaliteta za poljoprivredne i prehrambene proizvode.

Član 7.

(Stupanje na snagu)

Ova odluka stupa na snagu danom donošenja i objavljuje se u "Službenom glasniku BiH".

VM broj 79/19
10. juna 2019. godine
Sarajevo

Predsjedavajući
Vijeća ministara BiH
Dr. **Denis Zvizdić**, s. r.
